

Mar sheinn osag mhaoth nam ponc,
 A tha caoineadh fèadh nan tom,
 Tha do dhuan a's glaine fonn
 A tuiteam trom air m' aigne-sa.

Bho'n a thainig mi gu tuath,
 Taobh an t-sàil a's gàireach fuaim,
 Tha mi 'g ionndrainn fear nan duan,
 A dhuisgeadh suas gu aighear mi.

Bha sinn cairdeach anns gach àit',
 'S braithrean fàidhean is na bàird;
 Nuair a ghlacainn thu air làimh
 Bu chaoimhneil tlàth dhoinh crathadh dhi.

Ann a maduinn ait mo lò,
 An àm suidhe duinn mu 'n bhòrd,
 B' éibhinn leamsa fuaim do ghlòir
 A seinn nan òran cnithreamach.

Nuair a thigeadh tu air chuairt
 Anns a chòmhlan cha bhiodh gruaim,
 Gum biodh ceol, is fleagh, is duain
 A fògradh bhuainn gach smalanachd.

Gum biodh eibhneas anns an Dùn
 Nuair a thigeadh fear mo rùin,
 Mar phlath gréine fiamh a ghnùis,
 Cho fonnhor, uiseil, aighearach.

Bhiodh gach sgeula bh' anns an Fhéinn
 Air a h-aithris duinn le d' bheul,
 Anns a Ghaidhlig bhlasda, réidh,
 A labhair treun nan amaibh sin.

Nuair a theid a choisir cruinn,
 Bidh an comhlan air bheag loinn,
 Mur bi 'm bàrd a seinn an fhuinn,
 A cumail sunnd gu maduinn ann.